

- राष्ट्रपति द्रौपदी मुर्मू नै आखेआ ऐ जे आदि कर्मयोगी अभियान हर इक जनजातीय ग्रांऽ गी आत्मनिर्भर बनाने दे मकसद कन्नै शुरू कीता गेआ ऐ।
- प्रधानमंत्री नरेंद्र मोदी होरें श्रीलंका दी प्रधानमंत्री डॉ. हरिनी अमरसूर्या हुं'दा नमीं दिल्ली च सुआगत कीता।
- मिस्र दे विदेश मंत्री डॉक्टर बद्र अब्देलती नै अज्ज प्रधानमंत्री नरेंद्र मोदी हुं'दे नै मलाटी कीती।
- रक्षा मंत्री राजनाथ सिंह होरें हिंदुस्तान एयरोनाटिक्स लिमिटेड दी नासिक उत्पादन आहली इकाई च बने दे पैहले तेजस LCA MK 1A लड़ाकू जहाज दा अनावरण कीता।
- बिहार विधानसभा चुनाएं दे पैहले गेड़ आस्तै नामांकन दायर करने दी खीरी तरीक अज्ज ऐ।
- सुप्रीम कोर्ट नै डिजिटल अरेस्ट मामलें गी गंभीरता कन्नै लैता ते केंद्र ते सी.बी.आई थमां जवाब मंगेआ ऐ।

<><><><><><>

Prez. Karmayogi Abhiyaan

राष्ट्रपति द्रौपदी मुर्मू अज्ज नमीं दिल्ली च आदि कर्मयोगी अभियान पर राष्ट्री सम्मेलन च हिस्सा लैता। विकसित भारत दी अगुवाई च जनजातीय मामलें सरबंधी मंत्रालय इस सम्मेलन दा आयोजन करा'रदा ऐ। इस सम्मेलन दा आयोजन पी.एम जन मन ते धरती आबा अभियान कन्नै रलियै कीता जा'रदा ऐ। एहू सम्मेलन जनजातीय ग्राम विजन 2030 उप्पर विचार ते कम्में पर केंद्रित होग। इस कार्यक्रम दी इक मुख् खासियत जनजातीय ग्राम विजन 2030 दी अवधारणा बनाना होग जेदा मकसद नीतिगत सुझाएं गी खीरी रूप देना होग। राष्ट्रपति द्रौपदी मुर्मू होरें इस मौके पर आखेआ ऐ जे आदि कर्मयोगी अभियान हर इक्क आदिवासी ग्रांऽ गी आत्मनिर्भर ते स्वावलंबी बनाने दे मकसद कन्नै शुरू कीता गेआ ऐ। अज्ज नमी दिल्ली च आदि कर्मयोगी अभियान पर राष्ट्री सम्मेलन गी संबोधित करते होई राष्ट्रपति होरें आखेआ जे इस अभियान दे राहें एहू सुनिश्चित कीता जाग जे आदिवासी समुदाय राष्ट्रीय विकास दी बतै च भागीदार बनै ते विकास दा लाहू आदिवासी क्षेत्रें तोड़ी बी पुज्जै। केंद्री जनजातीय कार्य मंत्री जुएल ओराम, जनजातीय कार्य राज्य मंत्री, केंद्र ते राज्य सचिव, जिला मजिस्ट्रेट, मास्टर प्रशिक्षक ते देश भरै थमां आदि सहयोगी प्रतिनिधि इस कार्यक्रम च शामिल होए।

<><><><><><>

PM-SC

श्रीलंका दी प्रधानमंत्री डॉ. हरिनी अमरसूर्या नै अज्ज नमीं दिल्ली च प्रधानमंत्री नरेंद्र मोदी हुं'दे नै मलाटी कीती। प्रधानमंत्री होरें उं'दा गर्मजोशी कन्नै सुआगत कीता। प्रधानमंत्री मोदी होरें आखेआ ऐ जे उं'दी एहू ऐतिहासिक यात्रा भारत-श्रीलंका सरबंधें गी नमी गति प्रदान करग। मोदी होरें इस ब'रे अप्रैल म्हीने च अपनी श्रीलंका यात्रा गी चेता कीता। यात्रा दरान उनें श्रीलंका दी राष्ट्रपति अनुरा

कुमारा कन्नै सैह्योग दे सभने खेत्तरे पर जरूरी चर्चा कीती ही। दमें नेताएं शिक्षा, तकनीक, नमियें काहडें सरबन्धी विकास सैह्योग ते मछुआरें दे कल्याण सने मते सारे खेत्तरे च सैह्योग गी मजबूत करने दे उपाएं पर चर्चा कीती।

<><><><><><>

PM India Rivers

प्रधानमंत्री नरेंद्र मोदी होरें अज्ज आखेआ ऐ जे भारत दी नदियां छड़ा विरासत दी प्रतीक नेई ऐ, सगुआं प्रगति दे राजमार्ग ना बंदरगाह, जहाजरानी ते जलमार्ग मंत्री सर्बानंद सोनोवाल हुं'दे आसेआ लिखे दे इक लेख दे संदर्भा च प्रधानमंत्री होरें परतियै तैयार कीते गेदे जलमार्गे आस्तै अपना नजरिया प्रगट कीता। मोदी होरें आखेआ ऐ जे एहू लेख पिछले किश ब'रें च सैलसफा ते बुनियादी ढांचे गी मजबूत करने उप्पर लोऽ पांदा ऐ।

<><><><><><>

GST-Reforms

आम लोकें गी बड्डी राहत उपलब्ध करोआंदे होई सरकार नै इक बड्डी गैंऽ पुट्टे होई जीएसटी दिएं दरें च हाल च गै कटौती कीती ऐ। इस गैंऽ कन्नै आम लोकें दे जीवन च खासी सखाल होग। नमीं पीढिएं दे जीएसटी सुधारें तैहत केई सारी चीजें पर लगने आहले जीएसटी दी दरें च कमी कीती गई ऐ। इस गैंऽ दा समाज दे हर वर्ग आसेआ सौआगत कीता गेआ।

<><><><><><>

GST-Reforms Assam

नमें जीएसटी सुधारें कन्नै असम दे बुनकरें, करसानें ते लौहके कारोबारियें गी बड्डी राहत हासल होई ऐ। नमें कर ढांचे दे तैहत राज्य दे परम्परागत ते खेत्तरीय माल उप्पर जीएसटी घट्ट कीता गेआ ऐ। इ'नें सुधारें कन्नै असम दे चाऽ उद्योग गी खासतौरा पर फायदा होआ ऐ कीजे हुन चाऽ उद्योग पर 5 फीसद जीएसटी लगग। एह्दे कन्नै असम दी चाऽ देश विदेश दे बजारें च असानी कन्नै पुज्जग। एह्दे कन्नै गै मूंगा सिल्क ते गमोसा पर जीएसटी 12 फीसद थमां घटाइयै 5 फीसद करी दिती गई ऐ।

<><><><><><>

PM-Egypt FM

मिस्र दे विदेश मंत्री डॉ. बद्र अब्देलती नै अज्ज प्रधानमंत्री नरेंद्र मोदी हुं'दे नै मलाटी कीती। प्रधानमंत्री होरें गाजा रमानदारी समझौते च मिस्र दी महत्वपूर्ण भूमिका आस्तै राष्ट्रपति अब्देल फतह अल सीसी गी बधाई दिती ते मेद जताई जे एह्दे कन्नै खेत्तर च रमानदारी बनी दी रौहग। विदेश मंत्री अब्देलती नै प्रधानमंत्री मोदी हुंदी यात्रा दरान आयोजित होने आहली पैहली भारत-मिस्र रणनीतिक सांझ भ्याली वार्ता बारै जानकारी दिती।

<><><><><><>

थमां कम्म करदा ऐ, उसलै बजार, होटल ते ट्रांसपोर्ट सैक्टर सने होर दुई सेवां उपलब्ध करोआने आह्लें गी खासा बढ़ावा थ्होंदा ऐ।

<><><><><><>

NHW

जम्मू-श्रीनगर राश्ट्री जरनैली शिड़क पर अज्ज इक भेठा गड्डिणं दी आओजाई दी इजाजत ही। एह गैंड रामबन जिले दी धलवास थाह् हिफाजत सरबंधी कंद दे ढेई पौने दी वजह करी ऐ। आकाशवाणी जम्मू संवाददाता दी रिपोर्ट मूजब धलवास कश इस कंद दा इक बड्डा हिस्सा ढेई पेदा ऐ जिस करी इक भेठा दा शिड़क बंद ऐ जेदे करी गड्डिणं दी आओजाई पर असर पवा'रदा ऐ। राश्ट्री जरनैली शिड़कें सरबंधी भारती प्राधिकरण ते मुकामी प्रशासन आसेआ तेजिया कन्नै कम्म कीता जा'रदा ऐ। इक भेठा दा आओजाई यात्रिणं दी सुरक्षा दे मद्देनजर रक्खी गेदी ऐ।

<><><><><><>

Bihar Nominations

बिहार विधानसभा चुनाएं दे पैहले गेड़ आस्तै नामांकन दायर करने दी अज्ज खीरी तरीक ऐ। मुख मेदवारें च बीजेपी दे वरिष्ठ नेता ते सेहत मंत्री मंगल पांडे नै सिवान विधानसभा खेत्तर थमां नामांकन भरेआ ऐ। लोकगायिका मैथिली ठाकुर नै दरभंगा जिले दे अलीनगर चुनाव हल्के थमां बीजेपी दी तरफां नामांकन दाखल कीता। एह्दे थमां पैहले बीजेपी दे वरिष्ठ नेता ते गृह मंत्री अमित शाह होरें अज्ज पटना च अपने आवास पर बिहार दे मुखमंत्री नितीश कुमार कन्नै बैठक लाई। मीडिया आह्लें कन्नै गल्लबात करदे होई जेडीयू सांसद संजय झा नै आखेआ ऐ जे उ'नें चुनाएं आस्तै प्रचार-प्रसार लेई तफसीली चर्चा कीती कीजे दमें नेता अज्जै थमां प्रचार अभियान शुरू करा'रदे ना। दुई बक्खी कांग्रेस पार्टी दे नेता सुरेंद्र राजपूत होरें आखेआ ऐ जे महागठबंधन य सीटें दी बंड गी पैहले थमां गै तैय कीती गेदी ऐ ते समेंसिर एह्दी घोशणा कीती जाह्गा। कांग्रेस नै 48 मेदवारें दी सूची जारी कीती ऐ जेह्दे च पार्टी दे प्रदेश अध्यक्ष ते कांग्रेस विधानमंडलीय पार्टी दे नेता शकील अहमद खान दा नांऽ बी शामिल ऐ। आकाशवाणी दे संवाददाता नै जानकारी दिती ऐ जे सीटें दी बंड तैय होई जाने दे मगरा बीजेपी ते जनता दल यूनाइटेड नै अपना प्रचार च तेजी आह्नी ऐ। बीजेपी नै चुनांऽ आस्तै प्रचार करने लेई मते सारे राज्यें दे मुखमंत्रियें ते केंद्रीय मंत्रियें गी जिम्मेदारी सौंपी ऐ। उत्तर प्रदेश, मध्य प्रदेश ते छत्तीसगढ़ दे मुखमंत्रियें दे मगरा गोवा दे मुखमंत्री प्रमोद सवंज अज्ज प्रचार आस्तै पटना पुज्जे। चुनांऽ प्रचार मुहिम दे तैहत गृह मंत्री अमित शाह होरें अज्ज दपैह्नी सारण जिले दे अमनौर ते तरैया च किट्टु गी संबोधित कीता।

<><><><><><>

BJP-Rajasthan By Poll

बीजेपी नै अज्ज राजस्थान च औंदे विधानसभा उप चुनाएं आस्तै अज्ज अपने मेदवार दी घोशणा करी दिती ऐ। पार्टी नै राज्य दी अंता विधानसभा सीट लेई मोरपाल सुमन गी मैदान च तोआरेआ ऐ। मेदवार दे नांऽ गी बीजेपी दी केंद्री चुनांऽ कमेटी आसेआ खीरी रूप दिता गेआ ऐ।

<><><><><><>

Gujrat-Cabinet

गुजरात च बीजेपी दी अगुवाई आहली सरकार नै अज्ज नमें मंत्रिमंडल दी घोशणा कीती। हर्ष सांधवी नै राज्य दे उपमुख्यमंत्री औहदे दी संगंध लैती। गुजरात दे राज्यपाल आचार्य देवव्रत होरें अज्ज गांधीनगर दे महात्मा मंदिर च आयोजित इक समारोह दरान 21 मंत्रियें गी औहदे ते गोपनियता दी संगंध दोआई। इस मौके पर मुख्यमंत्री भूपेंद्र पटेल ते बीजेपी दे राश्ट्री अध्यक्ष जे.पी नड्डा मौजूद हें नमें सिरेआ शामिल कीते गेदे मंत्रियें च इक उपमुख्यमंत्री, 5 कैबिनेट सतह दे मंत्री, 3 सुतेंतर प्रभार आहले राज्यमंत्री ते 12 राज्यमंत्री शामिल हे। आकाशवाणी दे संवाददाता नै दस्सेआ ऐ जे नमें मंत्री परिषद च रिवाबा जड़ेजा सने 3 महिला नेता शामिल ना। मुख्यमंत्री भूपेंद्र पटेल गी छोड़ियै पूरे राज्य मंत्रिमंडल नै कल अपना-अपना इस्तीफा देई दित्ता हा।

<><><><><><>

SC Digital Arrest

सुप्रीम कोर्ट नै डिजिटल अरेस्ट मामले गी गंभीरता कन्नै लैता ऐ ते केंद्र ते केंद्री जांच ब्येरो थमं जवाब मंगेआ ऐ। सुप्रीम कोर्ट नै इये नेहू मामले आस्तै सख्त संज्ञान लैता ऐ जेदे च धोखेबाज कनूनी एजेंसिएं जा न्यायिक अधिकारियें दा रूप धारण करियै लोकं गी खासकरियै मती उम्री आहले लोकें गी ठगी दा शकार बनांदे ना। एह कार्रवाई हरियाणा दे अंबाला दी 73 बरे दी इक महिला दी शकैत पर कीती गई ऐ।

<><><><><><>

Maoists- Surrender

छत्तीसगढ़ दे बस्तर सूबे दे मुख्यालय जगदलपुर च अज्ज 200 थमां मते नक्सलियें अपने आपा गी सरेंडर करी दित्ता ऐ। इनें नक्सलियें नै 19 ए.के 47 रफलां ते 17 एसएलआर रफलें सने 153 थेहार सौंपे ना। अधिकारियें दी जानकारी मताबक सरेंडर कीते गेदे गिरोह नै गैर कनूनी तौर पर बने दे माओवादी संगठन दे बक्ख-बक्ख रैंकें दा प्रतिनिधित्व कीता हा।

<><><><><><>